



SAOPŠTENJE ZA JAVNOST

Određen pritvor Goranu Hubijaru zbog serije krivičnih djela teške krađe i neovlaštene nabavke i držanje oružja

(Brčko, 20.10. 2025. godine)

Na prijedlog Tužilaštva Brčko distrikta BiH, Osnovni sud Brčko distrikta BiH odredio je pritvor Goranu Hubijaru (51)* iz Brčko distrikta BiH, zbog postojanja osnovane sumnje da je izvršio produženo krivično djelo "Teške krađe" i krivično djelo "Neovlaštena nabavka, držanje ili prodaja oružja ili bitnih dijelova za oružje".

Osnovni sud Brčko distrikta BiH utvrdio je da su ispunjeni uslovi iz člana 132. stav 1. tačka c) Zakona o krivičnom postupku Brčko distrikta BiH, pa je Goranu Hubijaru odredio jednomjesečni pritvor zbog postojanja naročite okolnosti koji opravdavaju bojazan da bi osumnjičeni ukoliko bude boravio na slobodi mogao ponoviti krivično djelo, a za to krivično djelo se može izreći kazna zatvora tri godine ili teža kazna.

Podsjetimo, 15. oktobra 2025. godine Policija Brčko distrikta BiH realizovala je akciju kodnog naziva „VALTER“ usmjerenu na sprečavanju izvršenja provale u jednu kuću u kojoj su zatekli, a potom slobode lišili naoružanog Gorana Hubijara. Na licu mjesta je izvršen uviđaj i tom prilikom su pronađeni i izuzeti predmeti: pištolj marke „Whalter“, model PPK, kalibar 7,65 mm, kuhinjski nož, 13 mobilnih telefona, novac u iznosu 650 EURA i 70 KM u raznim apoenima, dvoje patike, te odijevni i drugi predmeti koji potiču iz izvršenja krivičnih djela. Kriminalističkom obradom prikupljeni su dokazi koji ukazuju da je imenovano lice u proteklih deset dana na području Brčkog izvršilo seriju krivičnih djela „Teških krađa“ i krivično djelo „Neovlaštena nabavka, držanje ili prodaja oružja ili bitnih dijelova za oružje“.

Treba istaći da se radi o povratniku u izvršenju ovih i sličnih krivičnih djela, odnosno da je početkom 2009. godine prilikom lišenja slobode upotrijebio vatreno oružje prema dva policijska službenika i tom prilikom jednog ranio, nakon čega mu je izrečena presuda za krivično djelo „Ubistvo“ u pokušaju sa kaznom zatvora u trajanju od 16 godina.

U daljem toku postupka, Tužilaštvo će nastaviti poduzimati sve zakonom propisane istražne mjere i radnje u cilju utvrđivanja svih važnih činjenica i prikupljanja dovoljnog broja kvalitetnih dokaza za dalje krivično procesuiranje odgovornog lica.

****Ovom objavom ne prejuducira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.****

**VRŠILAC DUŽNOSTI
GLAVNOG TUŽIOCA
RADMILO IVANOVIĆ**